



Regd.No.19134/88

<http://www.kbc.org.in>

NAI/220/99

No-G-4/Regd.Magazine/KBCThuso/MNP-81

KBC THUSO

Kum 54 Ihinna

Tolbol/January 2017

So 453



EVENTS
DR. COLVIN ACADEMY
DAY 05
AICS DAY OF
PRAYER 19

John. 17:11

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

CONTENTS

THUMAKAI HO

1. Editorial/ Walking with God	1
2. Kumthah thupi /Rev. Kaikhokam Chongloi	5
3. Nalampi ding kigel in/Pastor Seiminlen Haokip	7
4. Ipi jeh a Sodom Khopi/Jam Haokip, UTC Bangalore	11
5. Kumthah thulhuh na le Kitepna/Pastor Ngamneo Haokip	13
6. Pakaiyin manna nom naneije/ Rev. Silas J. Haokip	15
7. Mission Column	17
8. Men Column	21
9. Women Column	23
12. Christian Education Column	35
13. Report/Hetsah	36-39

EDITORIAL BOARD

Chairman	: Rev. Dr. HawIngam Haokip, President KBC
Editor	: Rev. Ngamjapao Haokip, General Secretary
Joint Editor	: Rev. Silas Jangminlen Haokip
Contributing Editors	: 1. Rev. Letpu Kipgen
	2. Rev. Henjalen Dounge
	3. Rev. Onthang Haokip
	4. Rev. Kaikhokam Chongloi
	5. Pastor Paokhohao Haokip
	6. Pastor Satminlen Khongsai
Cir. Manager	: Ms. Lhingjanem Haokip
Design & Layout	: Hemkholen Haokip

THUSO LAHMAN

Church/Organisation/ DepartmentRs. 200/-
IndividualRs. 100/- (Post a Rs. 200/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



“Walking with God”

(Text.Gen.5:21 – 24)

Editorial

Enock chun kum somgup le kum nga alhinin achapa masapen Methuselah ana hingin ahi,tin Bible in ihil'un ahi. Methuselah pengjou kum ja thum sungin Enock chun Pathen toh kilhakang louhel in ana kilhon khom jing jengin ahi tin aseijin ahi. Tukum Christmas program Kheng-joi Houbung (kei ma Houbung) tichu ka kho'uva kaga cheuvin, ka family kabon'un kagacheuvin ahileh family pumpia che kahi jeh'un nom kasa'ugin, khosung mi / Houbung mi ho jong akipah'un, keimaho insung in jong nom kasalheh' uvin ahi, aje chu ka family'a che kahi jeh'ugin nom kasa'un ahi. Tahsa hinkho jenga jong hitobanga nom akisah thei leh Enock vang chu kum jathum jen (300) Pathen toh akilhom khom jing jeng chu nom mong 2 ding ahi. Enock Pathen toh akilhon khom na dinga aki gel lhahna point phabep anojia hin ana veu'hiute.

1. Enock walked in God's direction (Pathen komupeh na bangin lam anajot in ahi).

Pathen in ahetsahna leh akomupeh bangin lam ana jot in ahi kiti chu, Bible in aseina ah chun, (i) Pathen toh akilhon khom jingin ahi, (2) Pathen toh kilhakang lou hel'in hinkho amangin ahi, (3) Pathen nunga jong chelou amasanga jong chelou thakhat tah in kal ason khom lhonin ahi. Chujongle amahin Pathen in ama dinga atohgon holeh adeisah ho bou ahinkho'a tohdoh ding chu alungtup ahipen in ahi.

2. Enock walked in Agreement with God (Pathen toh kinoptona in lam anajot in ahi),

Pathen in aseijouse chu Enock in phun lou hel in ajuijin ahi, khatcha jong anoplouna umlouvin Pathen thu ana ngaijin ahi. Ama hinkho'a konna jil doh thei chu ahileh Pathen thusei jouse chu phun lou hel'a anop jeh chun kum jathum sung chun ana kivop lhung keilhon in, hijeh chun Enock chun thina tepkha louvin ahingin van na lahtouvin ana'umtan ahi.

3. Enock walked with God in faith (Tahsan na in Pathen toh ana kilhon jing'e, Heb. 11:5).

Pathen tahsan na dettah aneijeh in ahinkho kum jathum sung chun Pathen ana lunglhai sah in, hiti chun ani anin pathen tahsan nan Pathen toh kal anason khom jing in ahileh Pathen kipana ana changtan ahi, (Eph. 2:8).

4. Walking with God is progressive(Pathen toh kilhon khom chu machalna ahi).

Pathen thupeh banga cheho chun Pathen phat theina tahsa lam le lhagao lam'a chang dinga thutep umsa ahi dan, Deut.5:33, sunga akimun ahi.

(1) Tahsalam phat theina chu ahileh; hinkho sotna, lungmonga chenna, lolhinna le kipana amu ding ahi tin Bible in aseijin ahi.

(2) Spiritual Fellowship chu ahileh; Amathu tep juiho chu Pakaijin Ama ding tum beh'a namtheng mite khatna atundoh ding ahi, tin aseijin ahi,(Deut.28:9).

Achainan:

Leiset chungu kiloikhom na(Society) lenpen chu Pathen mite kiloikhom na chu ahi akitin ahi. (The highest society on the Earth is the fellowship of God's holy people). Hijeh chun Kumthah/ New year mang pan ding ihu toh kilhon in i-mihem chan khompi hotoh thutah in kiloikhom'u hiutin, chule ahi deh in Pathen toh hinkho theng'a kiloikhom ding in taona toh thon kigel lhahna nei'u hiute, sopite ho. Mihem tehi kiloipi / kivoppi in jong akingam in ahi, kivoppi phalouvin mi chu setna lam'a apuilut theijin ahi. Hijeh chun kivoppi pha kilhan them angaijin ahi, Jesu Christa chu nitin na kivoppia i-huhhingpu ahi goh keu hilou'va i-loi/ i-golpha pen a jong pang thei ahiti geldoh jing pumin, lunglut tah'a anasim ho jousea dingin Pathen in phat thei iboh peh taohen, Amen.



2017 Kumthah ki Lemna

Muntin'a ngailut umtah Houbung mithengte ho jouse, naija le gamla a hi-jongle nabon chaovin imunpiu KBC Office a konin Kipana Kumthah Salaam kahinpe cheh uve.

Pathenin kumthah eimusah kit taovin, kumbul ahung hitoh kilhon in changval hihen Houbung chuleh kiloi khomna chom chom hijongle tohvai kihopna, kumsunga dinga project plan chom cheh ineitah diu kinep aumin, hiche ho jouse tohdoh jou theina dinga kumthah ahitoh lhon'a pan nasatah a ilah thah kit diuvin jong ikitiem uve. Pathen lungsetna vanga tukum 2017 kum hi a Houbung mithengte a dinga damtheina kum le tohga sona kum chuleh kilung khat tah a alenggam natoh na kum ahithei na din Pathenin phatthei eiboh cheh tao hen. Kakipah e .

KUMTHAH THUPI

Rev. Kaikam Chongloi
Secretary, Men Department, KBC.

LUKE 2:1-7

Amasan hitobang phatpha eipe'ah Pathen ka thangvah'e. Phat le nikhokum le lha ahung kihei heijin, Pathen lungsetna jallin a-imatih'a imu khah lou'u Kumthah 2017 chu imutauvin kipa thanop aum lheh jengin ahi. Tuchan geiya eihin puihoi uva Pathen thangvah in umhen. Kum thah kipatna ding kum hi tao pum'a, Pathen lungdei banga mantheina dia pan lah angaijin ahi. English te thuchih khat in "well begin is half done" ana tiuvin, hibang nga chu eimi ten jong hiche kumthah khat kipatna dinghi Pathen lungdei lam ma kibulphuna thah aum theina dinga pan ilah cheh diu nop um kasan ahi.

"Pathen lungdei lam"

Texts: Rome 12:1-2.

¹Chuti ahijeh chun, sopite, Pathen lungset vang hin nati pum-piu chu longlhen thengtah gan kihinglha'a bangin Pathen lah thei doltah in Pathenna kipeuvin, tia kahil nahiuve, hichu nalunguva lhagaova nahounau ahi. ²Chule nangho tulai vannoi leiset chon hin chon hih un; Pathen lungdei lam, hichu apha lah theile phat chamkim hi ipi ahi nahetdoh theina dingun lungthah keng unlang lim chom pu-uvn.

Solchah Paul in Rome bung 1=11, sungin tahsan thuhilho

(Doctrinal teaching) ahin seipeh in, Bung 12 a patnin tahsan chu toh'a vetsah dingin ahil'e, hijeh chun gan kihinglha'a bangin Pathen'a kipeuvin ati. Old Testament phatlai chun chonset thoidamna dingin gan kihinglha (scape goat) gamlah'a ahingin alhajiuvn, hichu Israel chate achonsetnau apohmang ji ahi (Lev. 16:10,21). Hijeh a chu na hinkhou chu chonset nen beh luvin Pathen a dingin gan kihinglha bangin peuvin ati ahi. Hichu Pathen lungdei lam jong hiding ahi.

I. Pathen Lungthim peh ding (verse 2)

Lungthim hin polam muthei natoh ho hi athunun ahin, lungthim hi joulhepna jeng dim ahi. Hijeh a chu Pathen dinga akipeh theng louleh satan natohna mun hiding ahitai. Bible in numei jon lunga vea chu amanu chutoh jonga ahitai ati. Thil ibol ding jouse hi ilungthim min aheth masatpen ahijeh chun Pathen lungdei lam suh bukipna dinga ilungthim'u Pakai peh angaije.

II. Pathenna dia Thenna Hinkho man ding.

Christian hinkho hi thenna in ajui loule, vetjui thei ihilou le, Dr. Luke in 14:34-35 a hitin aseie, "Chi jeng jong tam taken lang, a-alding bang ngin al tahir le apanna aum tapoi" ati bang khu kihi ding ahi. Peter in nakou pau Athen bangin nangho jong nun le khan na theng un atin ahi.

Francis Quarles, British lasem them Queen Elizabeth khon doma pangpan "Kahinkho kipat til laijin Pathen tahsan lel na lampia lheplah in ka um dehchet in, hinla Pathen chu kanel theilouna dinga eithujo a pang chu kapa chonchan suhling hoi hiloule vetjui dia lom ahinkho chu ahi" tin anasei kit'e, achuti leh eima hinkho kivet'u hite.

Leng Solomon hinkho ivet le abullam ahoilheh jengin Pathen kom'a chihna athum lai

jin Pathenin alungthim chu akipa pi behset jeh in houna jong apehtha tan ahi. Pathen deisahna achange ti imu uvin ahi. Ahinla thuneina ahinnei phat in mitamtah thuneina in asuhset ji bangin ama jong suhset in ahung umtan chonphatna lam'a alhasam tan ahi. Chihna sangtah neijin vetjui thei ding hinkho thudol a vang alhasam tan ahi (Proverb 31:4-5, Leviticus 10:9).

III. Pathenna dia insung kisem tup ding (Joshua 24:1-)

Joshua in ateh lam athikuonlam chun Israel phung abonchan Shechem kho'ah akhomsoh keijin ahi. Egypt gam'a kon ahung doh uva pat gamtep Canaan gam alo uva achenpha geijuva amaho dinga Pakai Pathen natoh ho avelsei kit in athah geldoh sah kit uvin, hiche toh kilhon chun Israelte jouse chu Pakai kin boldingin challenge ana bollin, ama le a insung mite jousen Pakai kin jeng boldia thulhuhna (decision) alah dan'u akimun ahi. Eiho jong kumkhat ihin mang chai tauvin, tua kumthah hi Pakai natohna'a panthah lahna dia thulhuhna sem pum'a igalkai diu kanomin ahi.

Hijeh chun itahsa pumpi, ilungthim pumpin, longlhen thengtah gan kihinglha banga Pathen lahthei doltah in kipeutin, Pathen lungdei lamin insung semtup uhiute.

NALAMPI DING KIGEL IN

Pastor Seiminlen Haokip
KBC C/C Lamphel, Imphal.

Text: Rev.3:1-6.

***“Thaneipen Pakaijin hitin aseije; Iti ti um nahi-
uvem phatechan nalungthim uvin ngaito tem
uvin”***

Haggai 1:7.

Thumakai:

Bible in Nalung thim uvin ngaito tem uvin atihi, thugil tah leh thu ngaitah ahi. Khangdong hinkho sunga hin lungthim'a ngaito ding leh vetphat ding thil tampi aumin ahi. Ajeh chu khangdong hinkho kiti hi, mihil tamtah in Sanakhang (Golden Life) tin aminvo un ahi, ahilou leh khanghoi lai tin jong iheuin ahi. Hiche khangdon lai ahilou leh khanghoi lai hinkho mankhel hin tahsa leh Lhagao hinkho lolhinna ding, pachanna ding, loupina ding, minthanna ding, tamtah asulamvai theijin ahi. Hijeh a chu khangdong hinkho lampi ijotna ahi, iche na ding lampi kivet phat'a chingthei tah a hinkho iman angaije. Khanghoilai phat hi aman tampen ahijeh in Pathenin Ama minloupina phondohna dingin adeijin ahi. Chutobangma chun

satan in jong agamchalna dingin amangcha nomin ahi. Hijeh a chu Pathenin thil hetkhen theina lungthim eipeh uhi, manchah a Eisempa lungdei a hinkho iman angaijin ahi. Chuleh khangdong hinkho sunga chepi dindga dei um phabep anaveu hite.

1. Khangdon hinkho hi chingthei tah a man angaije. I Peter 1:13.

“Hijeh chun nalung kong kigah unlang, lung limgeh chan umun, Jesu Christa ahung kilah tengle, nachunguva lungsetna kilhut ding ahi, hiche lungsetna achun nakinepnau ngai chamkimun”. Hiche Bible chang hi Peter in AD 64 phatlai ja Rome lengpa Nero in Christiante nastah a asuhgen-thei phatlai a atahsan chaten lung lhadaï louva tahsanna a

Christa akolchah jing nadiuva tilkhouna a jih a anathot ahidan akmu chenin ahi. Nalung kong kigah un atihi, Jesu Christa tahsan det tah a hinkho aman diu leh lhagao lungmit a Christa ahung kitna ding nikho galdot pum'a hinkho aman diu adeisahna aphongdoh in ahi. Hiti a chu tahsan dettah a apan uleh Pakai Jesu ahung kilah tengleh Pakai anga akinepnau ngaichim a aumdiu chu aphongdoh in ahi. Hijeh a chu akinepnau ngaicham kim aumtheina ding a chu, chingthei tah leh lung limgeh cha a hinkho aman diuvin tilkhouna aneijin ahi. Tunia nangleh kei jong khangdon hinkho hi chingthei tah leh lung limgeh cha'a iman dinghi Pathen dei leh Nu le Pa lungdei lam ahi tihi khangdong ten isuhmil lou diuvin ikitem'uve. Khangdon hinkho mankhel kiti hi kisihi na lah a asangpen ahi tihi geldoh pumin chingthei tah'a hinkho iman'u angaije. Khangdon hinkho imanna ahi, nitin ichena lampi kivet phat a setna teho idalhah'uva, Pathen dei chu ipi ham tihi geldoh pum'a khangdon hinkho mang dingin Pakai minin ikitem'uve.

Lekha sun khatnin khang hi den thum in aseijin ahi;

* Ichapan lai phat sung ahi. Nungah gollhang hinkho kikisem ahin,

* Nungah/Gollhan phatsung ahi. Nupi/Upa ding hinkho kiki-

sem ahi.

* Nupi/Upa hinkho sunga hi, ihung teh teng lungmonga ium theina dinga, chate hinkho kiki-sem ahi.

Hijeh a chu phat hin hinkho asem ahijeh a chu, khang/hinkho mankhel kiti hi, iteh geija genthei ding tina ahi. Hiche jeh chun Khangthah ten ichena lampi kivet phat a chingthei tah a hinkho iman angaijin ahi.

2. Khangdong hinkhoa ibol diuva dei umho:

Khangdong hinkho hi lolhingtah a manding itileh noiija kisei hohi jui kimkei angaijin ahi.

* Khangthah te hinkho hi nu leh pa jana le seingaina a hung kipan ding ahi. Eph.6:11.

* Khangthah ten amasatah a Pathen lenggam le achonphatna ikimudoh masat diu ahi. Matt.6:33

* Khangthahte chu lekha simding, mi suhal ding chule mi hilding ihuive. I Tim.4:12

* Khangthah ho chu phatthomna bei, mohthu pouva kinel baotama ngolkai le lungthim beiho kinelna a panglou ding ihuive. II Tim.2:14.

* Khangthah te chu gunchu a ponpan'a jachtana beihel natongmi, thutah, chu jangkeicha a phongjal mi ihidiu ahi. II Tim.2:15.

Chunga kisei hohi Khangthah ten ichepi thei'uva, iujui teng uleh, insunga, Houbung sunga,

gamsunga, kineppi umtah leh monpi umtah khangdong chu ihithe diu ahi. Tunin khangthah teho, insung, Houbung sung, Namsung, tahsa leh Lhagao hinkho semtup ding leh suhal dingin Pathenin nangle kei eingense toh lhonin, lung kitoh tah n Pakai hatna songin pan lathah utin, khangdon hinkho hi Pakai ginna le jana leh loupi na dingin hinkho mangu hiute.

3. Khangdong ten tahsa leh Lhagao hinkho manding dan: I Pet.1:15-16.

* Kisutheng mi, lungtheng sella um mi ihidiu ahi.

* Thenna hinkho hi galvon phapen tah a manding

* Tahsa lam thenna hin lungtup molsona lampi a apangin ahi.

* Thenna hin Lhagao hinkho semtup in apangjin ahi.

* Thenna hinkho iman uhin, Jesu nungjui ihinau aphondoh ahi.

Ihinkho manding dantoh gahvet kah thei ding chu: Asom le gup channa America President anahi, Abraham Lincoln hinkho thusim chu ivet leh Tahsa Hinkho thengthou tah in hinkho ahin mangtou peh in genthei tah in chihna leh themna ahin hol in ahileh, Pathenin phatthei aboh in, America pumpi a vaihom in ahungpangin, gamsung pumpi a ding thilpha tamtah anabol

doh in ahi, hijeh chun tuni chan hin ama hinkho thusim a konin vannoi jin kihilna leh kitilkhouna aneijin ahi. Ipi jeh a Abraham Lincoln chu Pathen phatthei boh chang a ham ? Ajeh chu amahin Tahsa leh Lhagao hinkho kitup tah leh chingthei tah a ahin man jeh ahi, chuti ahijeh a chu Khangthahte Pathen phatthei boh ichantheina diuva chu tahsa leh Lhagao hinkho hi thengthou tah leh chingthei tah a iman'u angaijin ahi.

4. Khangdong ten taona hinkho iman'u angaije: I King 3:9.

Leng Solomon in Pakai kom'a an ngollin taona amangin, chihna le thil hetkhen themna athumin Pathenin ataona asanpeh in ahi. Pathenin ataona iti adonbut em, "Ven Keiman chihna le thil hetkhen themna lunggil napeng ting, nangma tobang ching mäsanga jong ana um khalou lai, khonungjongleh nangma banga ching mihem hung umdoh kit lou ding ahi" (I King 3:12) tin anadonbut in ahi. Hijeh a chu Pakai kom a chu chihna, themna, lolhinna, chule thil jouse neipa ahijeh a chu, Ama koma taona a ithum diu ahi. Ajeh chu taona thanei dan leh athupi dan noija hin veu hite.

* Taona hi hinkho puidih le suhatna pang ahi

* Taona hi ilhagao Pathen toh kihoulimna jong ahi.

* Taona hi Pathen haona leh

thangvahna jong ahi.

- * Taona hi Pathen henga ichonset phondohna jong ahi.
- * Taona hi Pathen kom'a kipa thulhutna le ngaichat thumna jong ahi.
- * Taona vanga Pathen Lhagao theng thahatna jong kichang ji ahi.

Hijeh a chu Khangthahte hon pachanna le lungtup molso ding idei leh eima kihabol toh Ihon'a Pathen kom'a taona a ithum angaijin ahi, ajeh chu Pathen a kon a lolhinna hin kipana hinkho asodoh sah in ahi. Pathen phatthei boh kiti hi kipana dang atepi thei umlou ahi. Pathen panna lou lolhinna vang chu inatohna a kipa thei louna, kibung khenna, kitomona in apangjin ahi. Hiche jeh chun khangthah tehon Pathen toh pangkhom in chihna le themna hol'u hiute.

5. Khangdongten Pathen thu simjing'a hinkho iman'u angaije:

Pathen thu a kon'a Christa tahsanna inei uva, sochatna kinepna chu inei'u ahitah leh Lhagao hinkho hatjing theina ding a chu nitin Pathen thu simjing hinkho iman'u angaijin ahi. Bible hi Pathenin ahaikhum Pathen lekhabua thu kisun chengse chu kihilna a, kip-hona a, kipui jangna a, chonphat kisinsahna a dinga phatah ahi (II Tim.3:16). Bible sim hi Pathen houpi channa ahitoh Ihon'a, Lhagao a ithahatnauva pang ahi. Pathen houpi changlou mi chu Lhagao lam'a ahatngei pon, akhangtou theipoi tihi ihetcheh'uva, nitin hinkho a Bible simjing pum'a hinkho iman diuvin temna ikinei'uve. Bible (Pathen thu) thanei dan leh agil dan veuhite;

- * Pathen thu hi Hemto Chemjam sanga hemjo ahi. Heb.4:12
- * Pathen thu hi Sehcha tobang ahi Jer.23:29.
- * Pathen thu hi Phatvet tobang ahi James 1:23
- * Pathen thu hi Meivah ahi. Psalm 119:105
- * Pathen thu hi Vana an ahi. I Pet.2:2.

Chunga Bible chang kipe hohi phatechan sim leu hen, Pathen thu manlut dan leh thahat dan kicheh tah a hetdoh theijin aumin ahi. Christian khangdong khat hina a Bible sim/Pathen thu ngaicha lou ihileh, idinmun kivet phat angaijin ahi, ajeh chu nangman Christian kahi tijongle chun Lhagao a pentahna neilou nahi dan inun ikhan chun aphondoh ahi. Hijeh a chu Lhagao a mipengthah chun, Lhagao an (Pathen thu) ahilou leh Pathen loupina ngaicha jinga umding ahi. Bible simnom lou nahi leh nadin mun naki vetphat angaije. Christian khangdong vang chu Bible simjing pum'a hinkho man jing ding ahi. Pathenin athu simho jouse phatthei bohjing taken.

IPIJEH A SODOM KHOPI KISUMANG HAM?

Jam Haokip, UTC Bangalore.

TEXT: MATHEW 2:1-12

Bible a Sodom khopi akitile lungthim a hung kilang masapen chu Genesis bung 19 a Lot inn a lhung Vantil teni suhset ding go mi-hem kiloikhom hochu ahiuvin ahi. Chule hitobang lungput nei mi-hem hojeh a Sodom khopi kisumang ahi tihi neolai apat lungthim a eikikoipeh gou banga ikichin jingu khat hiding in kagingcha in ahi. Ahimong a Sodom khopi chu chung a kisei banga mi-hem le mi-hem kikah a kivopdan phalou hojeh a kisure ham ahiloule thildang jeh a kisure ham tihi thahgel dinga lomtah hidingin kagel in ahi.

Amasapen a hetlou a khohkhat chu ahile Pathen 'plan' chu ahi. Genesis 18:16-33 chu ivet a hile Lot inn a thilsoh ho masanga Sodom khopi suhmang ahinading 'plan' umsa chu muthei in aumin ahi. Sodom mite chonsetna sangtah chu Pathen kom analhung ah-itai. Anina a hetlou a khohkhat chu ahile "itobang chonsetna ham?" tihi ahi. Sodom te chonsetna pipen chu Genesis sungah akimupon hijongle Ezekiel ah aki muthei in ahi. Ezekiel 16:49-50 chun Sodom mite haosa tahle ninglhingsel a aum vang uva vaicha genthei ho khoto nale ngailutna aneilou jeh uva Pathen in a khopiu asuhmang ahi tin ase in ahi.

Vaicha genthei ho ngailut ding, khoto ding chule achung uva thilpha bolding tihi Bible in ahasei khat chu ahin ahi. Hinla hiche thu hi eiho lah in ahinading bangin akisei poi kitile kiseikhel lou maithei ahi. Lhagao lam tichu "individual spirituality" ikhohsah uvin hichu ahiding mong ahinai, hinla hiche "individual spirituality" hi anatoh tichu "praxis" a pilhin sah dinghi

ikhohsah behseh pouve kitile kiseikhel lou maithei ahi. Eiho society ahin vaicha genthei ho chung a thilpha bol jong chomkhat kikoidoh tadi le achan diuva lom ho kisan kilahpeh ji ahinalai in ahi. Hou-inn a Pathen thu ingai uva, la isah uva, itao uva ihung potdoh teng ule vaicha genthei hoding gellou a eima dingbou ikigel uhi Pathen lunglhaina hidingin ginchat

aumpon ahi.

Pathen ahina “character” tampi holah a khat chu ahile vaicha gentheite alainatpi hi ahi. Israel ten vaicha genthei, hatlou lhasam ho akhoto diu hi Pathen thupeh khat ahi (Ex. 22:21-27; Lev. 23:22; Deut. 15:7-11; Is. 10:1-3). Israel ten kisugim le an-ngol a Pathen ahou vang uvin genthei vaicha ho akhohsah loujeh uvin Pathen alunglhai deh pon ahi (Is. 58:1-12). New Testament a khangdong mihaopa thusim (Mat. 19:16-24; Mk. 10:17-25; Lk. 18:18-25) le Zacchaeus thusim (Lk. 19:1-9) akon Pakai Jesu nungjui le vaicha genthei ho kithopina akijop dan muthei in aumin ahi. Vaicha genthei ho khoto le ngailut nahin Pathen cha ihinao aphotchen ding ahi. Pathen cha ahiloule Christian kahi itiuva vaicha gentheihon ngailutna ineithe lou uva hile ihinao le Pathen ihetnao alhasam e tithei ahi.

Sodom khopi kisuhmang akon kihilna inei teng ule nehle don a kiven ding, numei le pasal ahiloule mihem le mihem kakah a kivopdan phalou akon kiven ding tiho ihasei uvin hinla vaicha genthei ho chung a imopohnao ihasei pouvin ahi. Nehle don a kituplou chule anop aninga

chon hokhu Sodom mite toh tekah jongleu hen Sodom mite toh kinaijo hochu neile gou a ninglhingsel ahivanga vaicha genthei ho khoto louho ahiuvn ahi. Setna dang hojong chu akhoh nai hijongle Bible in Sodom chung a sei vaicha genthei ho ahinading banga ikhohsah lou uhi Pathen lunglhaina hidingin tahsan aumpon ahi.

Mimasa hon eidalhah peh u tukhanga ikiletsah piu khat chu “khankho” itiu hi ahi. “Christianity” hunglut masang a mimasa ho khankho a khat le khat anakidonto uva chamdel le kingailutah a anachenkhom hou achapangpen in jong isei mangmo uvin ahi. Ahile hitobang chondan phatah Pathen thutoh kitoh inei uchu gospel hunglut jouvin hat chehle kilom ahin hinlah khohsah lou langjoh amano tan ahi. Bible isim dan ule Pathen ihet dan uhi ithahgel phat u ahitai. Pathen in igamsung uhi suhmang ding guong henlang hile mimu dinga chonse ho sangin mimu dinga chonpha chule neile gou a phatthei chang, ahivang a alungsung a vaicha genthei ho khohsahna neilouho joh khuol inte tin kagel e. Nang in iti nagel am?

KUMTHAH THULHUH NALE KITEPNA

(New-Year Resolution)

*Pastor Thongkhongam Haokip
Pastor KBC No.6(Tuilang Area)*

Text: Rev.3:1-6.

Pathen phattheina vangin ihin kumkhau akibe in Pakai sem Kumthah imukit tauve.

Kumthah lemna nikho phabep imang jiu un, hiche nikho sunghin mi tamtah in thulhuh naleh kitepna inei jiu-un, kismethahna, khan-tou machalna tohgon semna jong ineijiu un ahi. mi abang in agel-bang le akithulhuhna bangjou lou in losap jingle mi tampin kilol-hinpi ji a machalna tah a kinei ji ahin, thanop leh kipapi umtah ahi.

Tukumm Pakai kumsem 2017 kumthah ilemnau a jong mi ijat ham khat in lamchom choma toh bangkhai ho jo na ding, na-toh le kimanchah na a tohga so na ding, kismephatna ding, na-toh kipatna ding le adang dang tampi a eima mimal le Insung chuleh Houbunga thulhuhna leh kitepna sem tampi ium tei diu kagingchan ahi. Hiti ho jouse hi Huhhingna leh ilhagao sochatna ding hilou in tahsa le lhagao va khantou machalna le hatbe chehna ding bou ahi ithahgeldoh kit diu inom un, ahin Huhhingna chang tasa Pathen chaten vang kumthah lemna leh kumbul kigotna jengseh hilou vin nitin le phattina jong

ibol/ichepi jing diu thilkhat chu ahi.

Bible a mimasa teho hinkho le kalson dan ivet tengu le Pathen puihoina achan jeh uleh Pathen lungltheina dinga kitep naleh thulhuhna asem danu imu uvin ahi. Jacob in Pathen puihoina achan jeh in maicham sem pumin Pathen phattheina hoa kona Hopsom lah a Hopkhat Pathena apeh dingin thulhuhna asem in ahi(Gen.28:22). David in kikhokhahna dinga Pathen thu vejing le geljing dingin akithulhuh in ahi(Ps 119:15,16). Daniel jong Pathen deisahna a hinkho kitup tahle thengtah manga kisuboh lou dingin thulhuhna ana sem in ahi(Dan. 1:8).

Tukum 2017 Kumthah ihung lut'u toh kilhona eiho jong thulhuhna leh kitepna nei jouse chuleh aneilou ho jong, Ipakaiyu Jesu Christa jal a Pathen Chate ho jousen chungu mimasa teho hinkho thahgeldoh tohgom in eiki kounau KIPANA THUPHA HETTOHSAH phatah a pang dinga kigot naleh thulhuhna neipuma Pathen in hiti ho tong molso dinga kahinkho eijopbe peh a kumthah eimusah ahi ti a ikalson ding'u hi ngaichatna sangtah ahi.

Inamsungu le igamsung uvah, mihing hinkhoa Pathen cha hi naleh Pathen loupi kilahna alhom l'heh tan, Insung jong Christian insung hina kilang dohjou talou, Houbung jong Christa Houbung hina kilangdoh jou talou le Pathen chate kiloikhomna dinga kilom lou atamtan ahi.

Nitin ihinkhou le kimanchahna chuleh ikiloikhom nauva Pathen lunglhei na ding gellouva, Pathen a kinepna le kisonna umlouva tahsanlel tohbanga ahithe thei na a, jokham kham itiuva lhasam cheh cheh leh khesuh cheh cheh a ihinau kichehtalou va ahina(colour)

kicheh talou itam tauve kiti leh seikhel hilou ding in kagel in ahi. Tukum jong lunggel thah kengin eima mimal, Insung, Houbung in tukum kumlhunga eima umna mun cheh le ikalson nau mun jousea Pathen chate/ Christian ihinau tahlanga ihinkhou hi muthei le muthei loua jong tahpan cheh a Pathen in eideisah nau kitoh a thulhuhna neipuma ikalson thei cheh uva Huhhingna thupha hettosah a ipanthei cheh tenguleh muntina Pathen loupina kilang jinga, Pathen lunglhei na le aphaathei boh changte ihi diu kinemlel louvin Pathen lunglhei najoh holmasau hiute.

Thil jouse hung kondohna, phatthei chamkim konna Pathen lungdei in lunggelle thulhuhna neipum in kalsong leuhen alunglhei na mite ngai chat donlouva koi ngailou Pathen inahousatna eikikoppi uva eipui jing diu kinemlel louin tukum 2017 jong hi eima mimal le eima sungkah a ding jeng hilou in Pathen lungdei suhbulhit nale aloupi na ding joh lunggel leh tohgom neipumin thulhuna nei/ sem in kalsong phakit tau hiute.

Pakaiyin manna nom aneiye

(Mark 11:3)

Rev. Silas Jangminlen Haokip

LUKE 2:1-7



Thumakai

Jesu in alamlhah na jousea tohding kin le ajeh aneiyn ahi. Phatkhat chun aseijui hotoh kalchuh kut mang dingin Jerusalem jon in anache uvin ahi. Jerusalem khopi achun ama munom lou, that dinga kigong jing mi aume ti ahen ahi. Aseijui honjong chelou dingin aseijui uvin ahin Jesu ana nompon ahi. Jerusalem phah kon, Bethany khokeng alhun uchun aseijui mini chu kho sunga agache lhon a sangan nou kihen agasut lhona ahenga ahinpui lhon dingin thupeh aneitan ahi. Ahin, mi koitobang khat in ipi ding nati lhon ham tia ahin doh lhon le, Pakaiyin manna nom aneiye atipih lhon dingin ahil in ahi. Chutobang chun seijui teni jongchun abol in ahi.

Ipijeh a sangan amanchah nom ham? chule sangan lah a jong anou adeilhen khel khel ham?

1. Gancha hohi akum in athen na avetsah in ahi.

Masang lai in Hebrew miten kilhaina ding gancha chu gancha

theng ana mang uvin, imacha adang a kimang khanailou gancha hochu kilhaina in ana mang jiuvin ahi. Hijeh achu Jesu leiset a ahung lona ajeh chu amatah

kihaina thengtah ahiding avetsah nom ahi.

2. Masanglai miho chondan asuh bulhit ahi.

Masanglaijin angaria kiti chondan khat ana umin, hiche chondan dungjujin leng len ho le mi thupiho chun gancha mangchan khopi sunga analut jiuvin ahi. David in jong achapa Solomon chu amakhel a leng hiding ahi ti mihon amu uva ahetttheina diuvin sangan chungana tousah in ahi (1 Kings 1:33). Hichea Jesu sangan a atouva khopi sunga alut hin leng thupi khat alut avetsah in ahi. Chuleh, Zachariah themgao in jong Leng loupitah Messiah chu sangan nou chungana atouva Jerusalem khopi sung alut ding anaseidoh tan ahi (Zachariah 9:9).

Leng Jesu chu achunga tou jeng jong leh sangan chu sangan ahithou thouvin ahi. Sangan hi sa lah a sa nemnung, panna neiloupen, gancha holaha chihna lhasampen tahkhat a kihe gancha ahi.

Turkish te paochamtoh in Mihem phachom chu paisa siki neihih jong leh mi phachom ahithou thouvin, sangan vang chu sana in kijem jong le sangan ahithou thouve anatiuve.

Ipijeh a Jesu chun sangan chu manchah dinga analhen ahidem? Ngaito louthei ahipon ahi. Hichea kon ahi ipi jildohthei, hetdoh thei aum dem?

1. Hiche hi Messiah chungchanga themgao ho thusei guilhunna ahi.

2. Pathen lengam le alenggam itobang ahi aphondoh ahi. Leiset lengam ho banga namphu le pumkhat a kisemdoh lengam hilouva, kikhelna le kismethahna hinlhut lenggam ahiding avetsah in ahi.

3. Hiche lungthengsel sangan nou banga hi Jesu leiset a ahung lona ajeh athen jedan avetsah in chuleh lungthengsel le nemnung taha mihemte lhatdoh dinga hung ahi avetsah in ahi.

4. Hiche gancha sangan nou hin Pakai Jesu chu leiset a ahung lona ajeh suhbulhitna aum nading mun le phat a ahinpui naibe in, kal ahin selut sah in ahi.

Tunikho hin Pakaiyin manna nom kaneiey eihin tiu le ipi iti nadonbut diuvem?

Kachapang behseh nalaiye, ahilouleh kateh behseh tai iti diuvem?

Pathen bon kakom a umkha jilou ipi keipen tah eidei ding ham natidem? keipentah Pathen in ei

mangcha nomponte natim?

Hiche nu, khuchepa chu kei-sanga hatjo, phajo, boltheijo, chingjo themjo ahin, keisangin Pathen in mangcha nomjo inte natidem?

Ahin, lungthim sungil tah invang Pathen in eimanchah ding inom soh kei uve. Pathen in eihoa kona thil loupi aboldoh ding ideu uvin, Pathen in ei lungset diu ideu uvin, Pathen umpina ideicha ingaicha sohkei uvin ahi.

Khumkhana: Pathen in vannoiya

dingin thilgon le tohgon lentah aneiya ahi. Hiche thilgon ahin nangin jong panmun poimotah naneiya ahi. Pathen thilgon le tohgon nangle kei in pna ilah lou jeha lolhing louding jong ahidehpon, ahin, panmun poimotah la dingin Pathen in eideisah uve. Hiche panlahna dingin nangmatah nopna angaiya ahi, eimatah kigelhaha thulhuhna nei angaiya ahi.

Pakai Jesun sangan nou manna nom anei bangin nang le kei jong manna nom aneie. Amen.

Greetings

Mission secretary

Mission Column

Kum 2016 sung damsella eihin ching hoi uva chule Kum 2017 damsella eimu sah u va Pathen hatchung nung thang vah na sangpen kahin pen,kbc thuso sim jouse naboron un mission board thalheng in kumthah salaam kahin peove.

"Hiche mukhah lou kum thah hi Pathen in kuki Baptist conventiona kikhai lha houbung ho jousedin kipana,machalna,lolhina,chule pilhin nakum in eisem peh taohen".

KIPA THUPHON

Kum 2016 sunga tomngai tah a mission na ihin toh khom nao chung a kaki pana alene.

Houbung mite pon pan na jallin convention M/E kumbul tohgon abonchan tohdoh ahisoh keijin, missionary, Evangelist ho pay jong up to date ahicheh in pathen thangvah na ipeo ve.

Mission office lamma kona hung kigong kum budget hin gel khoh a pathen natoh na machal na ding a tomngai tah a pan hin la a share petheng houbung ho jouse chung a kipa thu sang tah in kahin phonge.

Office tohgon gel khoh na jalla office lama kona hung kigong budget/share kalvalla sum hinpeh be centre church/houbung ho jouse chung a jong pakai minin kipa thu kahin seije. Houbung kumsung budget lhit thei ja eikoi pao pathen hatchung nung thang vah na ipeove.

SEA missionary ho pathen thua kiman pia phunchel lou hella convention mission programme tosot gambih houbung ho jouse chung a jong kipa thu seijoulou kahin phonge.

Pakai jallin kum sungin dam mona neo neo insunga atou tilou I missionary hou jouse abonun adam cheh un, chule a Pathen natoh neova tomngai tah in apang cheh uve. Hattah le hangtah a apan jou jing uva chule pathen helou laiho huh hing na hong sung a ahin pui lut jou nadiu vin taonan geldoh jing u te.

Muntinna houbung ho jouse pathen natoh na a kitah taha tong dingle abana jong lungkhat thakhat tah a pan lakit dingin mission office lamma konin temna ahung kinei kite.

Tun kumthah ihung lut taovin tohgon thah kisem kit u hitin lungkhat thakhat in pathen songin pan ana lakhom kit tao hite. Pathen in imopoh na cheh uva lolhin na eipe cheh taohen.

Mission department one day conference

Kuki Baptist convention mission board mopoh na noija Manipur sunga kbc missionary hon pathen thu anahilu vakon tahsan na hong sunga hung lut Meitei hole Gurkhali ho jouse dia kigong one day mission conference 2016 chu achesa 12th Dec.2016 nin C/C National Game Village a lolhing tah in anakichai tai.

Hiche mission conference a chun Rev.Henjalén Doungel mission secretary speaker anahin "If you suffer as a Christian be happy" (1 Pet.4:16) ti topic in houlimna aneijin ahi. Manipur kbc mission field jouse akon tahsan cha mihem 320 lam ahung pang un chule field sunga mopoh na nei Evangelist hon abon un ahin kilhon piu vin ahi.

Hiche mission conference hi Pu S.Athang Haokip kbc Mission and Evangelism Board V/Chairman in sponsore abol ahi. Amale ainsung mite chung a mission board in kipa thu akisei je. Chule hiche kin lentah nei na dia hongphal tah a houin hintoh doh NGV centre church deacon board ho chung a jong kipa thu seijou lou akiphong e.

Hitabang mission conference Meitei hole Gurkhali ho dia kibol khom hi tuchung hi amasapen ahina lai je. Hiche hi mission board tohdoh len tah khat in akilan pathen thangvah na akipen ahi.

Pathen in kuki Baptist convention mission board khonung a manchah phatah hia ana toh na a machal na hin polut jing convention mission hi jing din phat thei boh jing taken.

Hearty reception cum Advent Christmas.



SEA gamma missionary dinga anakal song kbc khanglai 7 kum ni sung migam a pathen natong a agaum jou un damle bit in Nov.3 nichun Imphal tolpi ahung lhung taovin pathen thangvah na ipeo ve.

Damsella ahung lhun u to kilhon in achesa 6th Nov.2016 nichun C/C New Lambulane in vailhun nale kipa ankong sokhompina ana nei jun ahi.

27th Nov.2016 nikhon C/C Ngv houbung in kipa maicham semkhom pi nale ngailut ankong sokhom pi na program nom tah ana nei pi kit un

Chule 07th December 2016 nin C/C Canan veng Imphal houbung in jong SEA missionary hole Manipur sunga um eimi evangelist ho jouse Advent Christmas mankhom pina le kipa ankong sokhom pi na programme nom tah anagong kit un amaho jallin jong pathen thangvah na ipeo vin hitabang a missionary natong ho gelkhoh a kipah taha tilkhouna thu seipeha houbung ho jouse chung a kipa thu isei uve. Pathen in chung a kimin phah houbung ho cheng hi phat thei na thalhing set pe hen lang maban a jong mission natoh machal na dia pan lentah lajou jing houbung hijing taohen.

36TH ANNUAL ASSEMBLY CUM ELECTION **MEN DEPARTMENT** **LOLHINGTAH IN AKICHAITAI.**

Achesa December 9-11, 2016 sungin Lonpi Khonou Baptist Church mun'a KBC Men Department 36th channa Annual Assembly cum Election chu Pathen mapuina jallin gamsunga boina imacha umlou hellin lolhingtah in akichaitai.

Dated 9/12/2016 nin 05:30 Pm in KBC Flag khaidohna Rev. ST. On-mang Haokip, President Men Department in aneiin Programme akipantan ahi.

10-12-2016 nin Assembly akipan in, Report pedinga lom hon apeuvn, chutoh lhonnin Recommendation ho leh Propose Budget 2017 a dia jong seilnah ahitai. Chujongleh Lamkai thah kilhenna jong aummin anoija ho hi lhendoh ahitaove.



1. President : Pu Lienboi Singsit, C/C New Lambulane
2. Vice President : Pu Thangtinhin Doungel,
C/C Salem village, Sapormeina
3. Recorder : Pu Jampao Baite, Lungngil B/Ch. KBC No.11.
4. Work Committee: Pu Nohsei Haokip,
New Keithelmanbi B/Ch. KBC No.7.
5. -do- : Pu Jangpao Mate,
T.Champhai B/Ch. KBC No.8.

Chujongleh Cultural Display akibol in hiche a pan hinla ho jouse



chungah kipa thu akiphongin ahi. Adeh in Pu Ngamlal Baite Chief Guest, Pu.Limkhojam Haokip Functional President chuleh lasa ho leh lamtho ho jouse chungah kipa thu akiphonge.



Chuleh kaikhomna jong li (4) vei akineiin anoija ho cheng hin thupi eiseipeh'uve.

1. Rev. Ngamjapao Haokip, General Secretary, ama hin

2017 KBC Diary jong athenso in ahi.

2. Rev. Paojangam Haokip, Pastor KBC Gambih No.1. Imphal Area
3. Rev. Demkhoneh Dounge, Pastor C/C Molnoi Area
4. Rev. ST. Onmang Haokip, President Men Department KBC
5. Rev. Silas Jangminlen (Boipu) Haokip, Director Shalom Bible College in Devotion alan ahi. Chuleh Pu Hethong Haokip in Development chungchanga class alan ahi.

Achainan Host eibolpeh'u Lonpi Khonou Haosapu leh Houbungho chungah seijoulou kipa thu akiphonge. Delegate ho lupna touna, neh le don ijakai a kitup tah'a aphatcha cha'a thilho asuhtup'u, Deligate jouse alunglhai sah uvin kipa aume. Chule Assembly Mess jong Sponsore eibol peh jeh uvin kipa thu seijou lou Men Department KBC in akiphong nge.

Rev. Kaikam Chongloi
Secretary, Men Department, KBC. (India).

Women Assembly

Achesa nisim 13-15, December 2016 sunghin 46th Chan na KBC Women Department Assembly chu Centre Church Kangpokpi Gambih No. 5 mun a akineijin, Gambih 20 lah a Gambih 16 Present ahin, Gambih No. 12, 13, 17 chuleh 20 absent ahivue. Assembly member mi 160 akikhom doh in , Pathen lungset in Assembly boina umlouvin



akichai theijin Pathen thangvah aume. Khonei Houbung miten kipah tah in neh le chah, Gena touna phate chan eibol peh un achunguva kipathu akiseije. Chujongle tukum hi Lamkai thah kilhen kum ahitoh Ihonin Pastor Khuptionlal Hangshing Presiding hina in kitup tah in 2017-2018 sunga Nute Lamkai ding kilhen na jong boina umlouvin akichai theijin Pathen kathangvah e. Pathen le mipi dei dungjuija 2017-2018 sunga Lamkai dinga kilhengdoh ho noija ho hi ahivue.

<i>President</i>	<i>=Pi Hekim Khongsai</i>	<i>-C/C B.Vengnom No. 8</i>
<i>Vice President</i>	<i>=Pi Hatneilam Haokip</i>	<i>-Chassad Avenue B/C.No. 1</i>
<i>Recorder</i>	<i>=Pi Hatkhochin Haokip</i>	<i>-C/C Langol No. 1</i>
<i>Member</i>	<i>=Pi Nengboi Haokip</i>	<i>-E.Mulam B/Church No. 19</i>

Joint Meeting with Prescilla:

22nd November, 2016 nikho hin Sharon Centre Senapati, Prescilla Centre New Lamka , Lydia Resource Centre KBC toh Prescilla Centre Gawahati tetoh Joint Meeting KBC Office Chapel Hall a akinei khomin, KBC Women ten jong 2017-2019 chan kumthum a dinga Partnership a Lydia Resource Centre le Prescilla Centre Gawahati tetoh tohkhom ding tin alang alanga kinop tona akineitan ahi. Hiche kinop tona ho chu, amahon kumkhat na ponkhong student mi 10 neh le



chah le Training Free a apehdiu, Lupna Bed 11 apehdiu, Instructor le Supervisor monthly Salary apehdiu Computer Set khat jong apehdiu ahi. Pathen thangvah in um jingta hen.



**Lydia
Resource
Centre**

Graduation Day



December 19th, 2016 Monday nikho hin Lydia Resource Centre mun'a ponkhong Training bol ho mi nga (5) Course chai ho (1) Vungngaithem Chongloi. (2) Lamneilhing Haokip (3) Nemneilhing Singson (4) Nengneilhing Sitlhou chuleh Chinneithem Tuboi amaho chenghi Certificate pehdoh na le Pathen henga taopeh na Rev. Ngamjapao Haokip, General Secretary, KBC Kin thempu hina in kilom tah in Graduation Day akimangin Pathen thangvah aume. Hiche kin a eihung lhah peh uva Pakai lhacha ho, C/C B.Vengnom Pastor pale atokkhompi ho, C/C Tuibuang Pastorpa, C/C S Kanan Veng Pastorpa chuleh Gambih No.8 Women Secretary chuleh Kin thempua eipan peh u Pakai lhachapu, abon chaova chungah kipa thu Nute jouse thalhengin ahung kiseije.

Lhingjanem Haokip, Secretary, Women Dept.



Shalom Theological Seminary

Kuki Baptist Convention

Koi tobang nungah gollhang, minu mipa, houbung lamkai le gamsung lamkai penthahna nei a Pathen thu hetgil nom hon noi a thumop dungjui a zil thei ahi.

- | | |
|------------------------------|---|
| 1. Course min | : Certificate of Theology (CTh) |
| 2. Course simna pao | : Eimi pao thengset |
| 3. Amun | : Centre Church, Salem Village Sapormeina |
| 4. Mess/Course/Hostel fee | : Mi khat a Rs. 4000/- |
| 5. Phatbih masa | : March 13 (Monday)- April 8 (Saturday) |
| 6. Koi in asimthei | : Mi pengthah anom jouse |
| 7. Lekha thepna ngaicha | : Labu Bible kivet thei apat chunglam |
| 8. Ipi pi kipoh ding | : Labu, Bible, janpon, von, eima ngaichat cheng |
| 9. Application Form hoa kimu | : KBC Office leh C/C Salem Sapormeina |
| 10. Last Date itih | : March 6, 2017 |

Hetsah

1. In mun a kona kile a kainom hon mess fee leh hostel fee jaolou a course fee Rs.2000/- bou peh a simthei hiding ahi.
2. Thinglhang a um Office moh phah joulouho in Phone a Office hetsahna ahin manei uleh Office hetpehna dungjui a Application Form noia kivetsah bang a ahin kism uva March 13, 2017 teng ahin kipoh thei uva thil ijakai akisuhtoh thei ding u ahi.

Thuchen dohbena ding:

Rev. Silas Boipu, Director, Shalom Bbile College,

Phone No 8413960326, 8974894706

Email: shalomkbc2010@gmail.com



Kuki Baptist Convention

APPLICATION FORM

01. Min (JEM LEN) :
02. Pa Min :
03. Pen Nikho :
04. Kho min :
05. Houbung min :
06. Lekha Thepna :
07. Na penthah nikho/kum :
08. Na zilna sum kon apeh ding ham?:
09. Ji na nei hi tam? :
10. (Ji na neileh) Dantheng ham ipi ham? :
11. Application Form toh pehlut khom ding:
- 1- Testimony
 - 2 –Head Deacon/Pastor phatseina lekha
 - 3 – Form man Rs. 30/-

2016 Convention Level

Sunday School Exam Result

Pilhing

1. D. Seikhomang Haokip	S. Theimol B/C	Gb. 8	99	1st
2. Heneng Chongloi	C/C Salem Saikul	Gb. 3	99	1st
3. Neishi Haokip	C/C Langol	Gb. 1	981/2	2nd
4. Tinkhohoi Haokip	Makhao Tampak	Gb. 11	981/2	2nd
5. M. Thangminlen Haokip	Chahkap B/C	Gb. 12	98 1/2	2nd
6. Nengneilhing	Chingdai Kholen	Gb.2	98	3rd
7. M. John Ngamminthang Haokip	Chassad Avenue	Gb. 1	98	3rd
8. Manglun Haokip	C/C M. Thingjabong	Gb.8	98	3rd
9. Tingcha Haokip	A. Tuisomjang	Gb.18	98	3rd

Senior

1. Paojahao Kipgen	Pangjang	Gb. 3	93	1st
2. Nengneihoi Dounel	Molkon Bazar	Gb. 3	88	2nd
3. Hoichinting Hangshing	C/C T.Vaichong	Gb. 6	88	2nd
4. Nemkhochin Haokip	Gothol B/C	Gb. 8	80	3rd

SUHTHENGNA

2017 pilhing Sunday School Simmun lekha bu a printed price (MRP) Rs. 80/- akitat in ahin Rs. 100/- in akijoh e, Hiche hi press tetoh fixed kibolsa dungjuja Master copy anasemchai sa ahin, Economic Blockade jeh a paper ahng theilou khah a phat chom-khat ana khongai juva paper ahunglhun jouva paper man hakal a ahungkal phat a lekhabu man fix kibolsa chu hithei talou ahin, Paper man kal dungjui a aman athah a kikhoh toh pa dung juja Rs. 100/- a kijoh ahitai. Houbung mite jousen ana hethem ute.

Pastor Haoneo Haokip
Secretary , Literature & Publication.

KBC CENTRE CHURCH

NEW LAMBULANE IMPHAL

HOUIN THENSONA ANA UM



Phat le nikho thalejung, sumlepai, neilegou, lungthim le ngaito-na chule taona tamtah pum a hung kisa KBC Centre Church New Lambulane Imphal New Church Building chu December 16 (Friday), 2016 nikho in Rev. Ngamjapao Haokip, General Secretary KBC kinthempu in akikhomdoh mipi 1200 vel angung le Pathen angung ah Pathen min in katdohna le thensona ana nei tai.



Houlamkai, houbung lamkai, convention lamkai, houbung mi le gamsung mi tamtah in a oup un ahi. Rev. Seikholet Singson, Founder KBC in Report thensona anei in, Rev. Dr Hawlngam Haokip, President KBC le Rev. Letpu Kipgen, Finance & Property Committee KBC in kipapina le tilkhouna thu aseilhon in, Pu Thangmang Haokip, Building Secretary in houin kisahna chungchang report apen, Pastor Onkho Haokip in Message aseil in ahi. KBC Central Choir, Church Choir Centre Church New Lambulane, Church Choir

Centre Church Langol, Church Choir Centre Church NGV, Church Choir Baptist Church Chassad Avenue, cheng in vahchoina la ngeitah cheh asauvin ahi.

Hiche houin hi 2012 April 17 nikho a ana kisapan ahin alet dan 96x64ft a len, dan (floor) ni chan kisa a, Balcony le Convention Hall chule Church Tower chan kitousah peh ahi. Chawkidar Quarter, Pastor Quarter, Sunday School Class Rooms, Lenkhom Hall, Ladies



and Gents Washroom, Houbung Kitchen, Church Office, Guest Room, Library Hall, Baptism Pool, le Parking um a kisa ahi. Houin kaina mun hi thakhat tah a mi sangkhat in Pathen ahoukhomna thei ding a kisa ahi.

Hiche houin kisahna ahin Building Project hung kipat akon in kum 10 val alut in, akisah mong mong sung hi kum 5 alut jou in, nikho 1,693 alut in, mistry tha 8,515 alut in, houbung mite in tha 3,000 val akisep in, cheh (Bricks) 2,13,000 val alut in, cement bag 10,980 alut in, dangka 5,20,17,742 val alut in ahi. Hiche crore 5 val lah a crore 2 vel KBC Office akon sanction kimua crore thum val hi amun houbung mite panlahna ahitai. Hiche houin hi eimite lah ding a sum tamlutnapen le akisahoi loi hita ding in tahsan ahi.



KBC CENTRE CHURCH KANGPOKPI

Hou in thah Centre Church, Kangpokpi hou in chu kilom tah in December 21st, 2016 nikho in KBC General Secretary Rev. Ngamjapao Haokip in anathenso tai.

Hiche houin theso na a pan laho jouse, Convention, Houbung kiloikhomna jat chomchom leh mimal jouse chung a kipa thu kahin sei uve.

KBC C/C KPI.

KHOPI MAICHAM LOLHINGTAH'A KICHAITA.

Pathen lungsetna jallin Pakai kum 2017 "Khopi Maicham" chu nisim 3rd Tolbol 2017 nikho in lolhing tah in Houbung miten akimangin, hichea ankhau hi Convention sunga Chaga genthei te kithopina dingin kahin peuvn ahi, hichea ankhau kimujat anchang Kg.100x20 = Rs. 2,000/- Ancheman 230/- agomin Rs. 2,030/- ahi.

Pathen chu thangvah in umtachen.

Pakaija natohkhompui,

Lamhen Kipgen

Secretary, Pangjang B/Church, KBC No.3.

5 vei channa

KBC No.8 Nute Kumlhun Kisuh halna

Lolhingtah'a chai hita.

5vei channa KBC Gambih No.8 Nute Kumlhun kisuh halna B.Vengnuom Centre Church munna Dated 3/12/2016 nikhoa kimang lolhingtah a chai ahitah jeh in, Pathen thangvah in umhen. Hiche nikho kimanna sunga Nuten kiminhpah ho Title khat cheh akipen chule pachatna sangtah Award khat jong pehdohna akineijin ahi.

1. Pi Heshi Haokip, W/O Pu Ngamthang Haokip, Minister, IFCD Jin-Gun "Khoto them" Prov.31:29.
2. Pi Lamneihei Singson, Announcer, AIR Thadou Programme Jin- Ja-Um "Thuphong them"
3. Pi Themhat Haokip, Former Women Secretary, KBC No.8 Kin Neinu "Gunchu tah" Prov.31:25.

Pachatna Award: Pi Nemneikim Kipgen, Kipgen veng "THOH HAT" Prov. 31:12

Ajipa Pu Paokam Kipgen toh Houdan thenga akichen lhon kum 24 lhinna Anniversary ahin manlhon toh kilhonin, vetton thei tah Nu hina pachatna Award akipen ahi. Ajeh chu 23/11/1992 nia a-inneipu toh Houdan thenga kichenna aneijou Date 28/11/1992 nikhoa Gari Accident a konin atahsa ajen ham (Paralyse) ainneipun anungsunga kile dinga asol vangin anom dehpon, Kin thempupa angsungle Pathen le mipi angsunga akitepna atuhchah jenga chule ajipa akolchah a phatecha ajenna alimbolna chungu Gambih Nuten vetton thei tah minu khat ahina jallin pachatna sangpen Award akipen ahi.

Tuchung Gambih Nute kisuh halna a dinga kiminhpah Nulun ho chungu Pakai minin kipathu akiseije. Chuleh vetnom um tah tah vetsahna le Bible lungchin saotah tah seiho le vahchoila ngeitah tah sa Nute chungu kipathu akiseije. Adeh set in Pi Heshi Haokip, Jin-Gun in achombek in akipana jalin pan la jouse Nute ho jouse Rs.1000/- cheh apen ahi.

Pathenin Gambih Nute ho jouse phatthei eiboh tauhen.

Mrs. Nengkhohat Haokip
Women Secretary,
KBC Gambih No.8.

KBC THUSO THUA HETSAHNA



Amasan muntin'a KBC Thuso sim jouse Kipana Kumthah Salam kahin peuve.

Tukum 2017 kumthah imu'utoh kilhonin muntin'a Thuso ngailua ana sim jinga Thuso lahman kitup tah'a hinpe jingho jalla tuni chan'a i-Thuso'u machal jing ahijeh in nachung cheh'uva kipathu kahin seije.

Koi hijongleh Houbung hihen, Department chuleh changval a Manipur sung hihen lang Manipur pam lang hijongleh Thuso lahman akum kum'a aphatcha pelouhon nahin kipeh cheh diuvin hetsahna ahung kineije. Ijem tia kum ni (2) chunglam bat neiho hi hung kithot jom thei lou ding ahitai. Kumkhat'a lah man:

- | | | |
|-------------------------------|---|-----------|
| 1. Houbung le Department | - | Rs. 200/- |
| 2. Gampam'a Post a kithot ho | - | Rs. 200/- |
| 3. Changval'a laho (Handpost) | - | Rs. 100/- |

Editor
KBC Thuso.

Sibong Khudengthabi Baptist Church

KBC NO.15

Diamond & Golden Jubilee celebration

on 20th December, 2016 (Tuesday)



Diamond Jubilee stone Dedicated by:

Rev.Ngamjapao Haokip Gen. Secy

KBC Diamond year:

1956-2016 Theme: This is the day that the Lord has made; Let us rejoice and be glad in it. Psalm. 118:24

Golden Jubilee stone Dedicated by

Pastor Henkhomang Tuboi KBC NO.15

Golden jubilee year:

1956-2006 Theme: Thus far the Lord has helped us.
1 Samuel.7:12

Hallelujah Hallelujah Hallelujah May Almighty God bless
Sibong Khudengthabi Baptist church in the days to come

Reported by: Paoboi Kipgen

Church Secretary

Sibong khudengthabi Baptist church KBC.NO.15

KBC Kumlhun Audit 2016.



January 11th a kipat in KBC Office mun'a Kumlhun Audit Sumle pai vetchilna aumin, Auditor mi 8 hon Centre Church Houbung 20 ho'a Account Head wise chule General Account, Department wise a Account ho le Institutions ho Account vetchilna akineitan ahi.

Khothah T. Khonomphai



Churachandpur Gambih No 8 a T. Champhai kom a Khothah T. Khonomphai chu Kuki Baptist Convention Gambih sung a Houbung khat ding in lahlut na Rev. Thanglen Haokip Gambih Pastor pu leh gambih sung a lamkai phabep in kilom tah in nisim 4 January chun kin khat ana neitaovin ahi, Tua pat a imalam jousea amaho jonghi Gambih kimanchah na a jousea Houbung khat a pang ding ahitah jeh in a houbung miten jousen Taona in kop jing uHITE.



GAMBIH NO.14 CHATE CAMP KICHAIT A

Gambih No. 14 Women Department tohgon na noiya chapang camp chu Jan.5-9 chan Gamphajol houbunga ana kibollin lolhing tah in akichai tan ahi. Camper mi 450 val aki su ton thu le la in nasa tah in kisuh halna aum in ahi. Camp speaker Evan. Helun Chongloi, Counsellor Mr. Paolunlal Kipgen le Camp Director Evan. Letjangam amaho cheng makai nan camp chu lolhing tah in aki mang chai tan ahi. Chate tamtah in Jesu Christa tahsan nale ama a dia kipeh doh na aneijun amaho jouse adingin jong muntina um houbung miten taopeh jingu hite. Gambih Women Department ho chate adinga napan lah nao mudoh thei jin aum in Pathennin machal nale khan-tou na eipe jing taohen.

Pathen in KBC Gambih No.14 chate jouse phatthei boh henlang aleng gam natoh nadin hin mang cha jing ta hen.

Keima, Paolunlal Kipgen, Director Children Ministry KBC

HEAD OFFICE A MANCHAH DING PRINTER THAH



Achesa Nisim 9 January 2017 nikho chun Office a General Secretary pa PA pa manchahding in Printer thah khat lamdoh na akineiijin, Rev. Y. Haokip Theological Board Chairman pu in Pathen heng a lhandoh na taona anei toh lhon in tua pat a manchah theina chan a mancha ding in aki koi tai.

Hiche thil thah lambe theina eipeuva Pathen thangvah in umtahren.